

# INUIT ATAQATIGIIT

## Inatsisartuni



UPA 2019/118

13.05.2019

Mikivisuk Thomassen

Inatsisartut suleriaasianni § 36 naapertorlugu matumuuna apeqquteqaat aallaavigalugu oqallinnissamik siunnersuut saqqummiuppara:

**Qanoq iliorluni nunatsinni inoqarfiit inuerukkiartortut, inuerukkiartornerisa illuanut saatsinnissaa pillugu apeqquteqaat aallaavigalugu Inatsisartunut oqallisissiaq.**

(Inatsisartunut ilaasortaq Jess Svane, Siumut)

Siullertut qujarusuppugut oqallisissiaq pisariaqartoq pillugu saqqummiussisumut.

Inuit Ataqatigiit manna oqallisissiaq pingaartuteqartutut isigaarput, oqallisissiammi saqqummiunneqartup ersersimmagu sulii ullumikkornit annertunerungaartumik nunatta inuussutissarsiornikkut ineriartortinneqarnissaata ataqatigiissarneqartariaqarnera.

Nunarput inuussutissarsiornikkut qanoq ineriartortikkumanerlugu immitsinnut aperisariaqarpugut. Apeqqut tamanna inunnit 31-init kisimi suliassaanani inuiaat suliassaatur isigissavarput. Aammattaarlu nunatta aqunneqarnerani suliassatur pingaartutut inissinneqaqqullugu partiit akimorluta isumaqatigiissutigisariaqarippat isumaqarfigalutigu.

Oqallisissiaq manna apeqqutinik arlaqartunik qaqsivoq. Sooq inoqarfiit ilaat inuerukkiartorfiuppat? Aamma inoqarfiit ilaasa inuerukkiartornerat sumit patsiseqarpat? Inoqarfiit ilaasa inuerukkiartornerat arlalippassuarnik patsiseqartoq ilisimareerparput. Inoqarfiit ilaat suliffissaaleqinermik eqqugaaqqapput, ilaallu ingerlalluarlutik, ilaat ineqarniarnikkullu kinguussaaqqallutik periarfissatigullu saaffigineqarsinnaasut annertugisassaanaatik.

Tungaviusumik isumaqarpugut inoqarfiit inuerukkiartunnginnissaannik tamatta kiviteqataasariaqartugut peqataasariaqarlutalu. Avaqqunneqarsinnaanngilarlu suleqatigiinnikkut akuutitsinikkullu kivitseqataassasugut. Inuerukkiartornerneq illuanut saatinneqassappat, qitiususaaq tassaassaaq inoqarfinni innuttaasut inerisaanermi peqataatinneqarnissaat. Pingaarpormi inoqarfinni ineriartortitseqqinnerni innuttaasut taakuussammata ineriartortitsinermut ingerlatsisut, nunaqarfimminni illoqarfimminilu ineriartortitsinermut piginnittutut misigillutik ineriartortitsisut.

# INUIT ATAQATIGIIT

## Inatsisartuni



Inuit Ataqatigiit nuannaarutigaaqput nunaqarfinnut tunngasut eqqartorneqaleraangata anguniagaqartoqaleraangallu pilersaarusiortifigineqaleraangatalu peqataatinneqartarnerat taannalu attattuarnissaat pingaaruteqarpoq, nunarput siammassuummat isorartuujullunilu nunaqarfiillu ilaat avinnarpasissumiillutik inooriaaserlu assigiinngitsorujussuulluni, taamaammattamakkua aamma eqqumaffigilluarneqarnissaat pingaaruteqarpoq

Aammattaaq nuna tamakkerlugu iliuusissatut pilersaarusiortarneq atuussimagaluarpoq, uggornaraluartumilli tusarsaajunnaarpoq. Taamaatumillu manna iluatsillugu kaammattuutigaaqput nunap ineriartortinneqarneranut suliat siunissamut ungasissumut isigisut nangeqqinneqarnissaat. Tamanna pingaaruteqartutut isigaarput, tassami nuna qanoq ittoq pilersikkusunneqartoq isumaqatigiissutaalluaruni sulinissamut iliuseqarnissamullu toqqammavissat ersarinnerulerneranit kinguneqartussaammat.

Kiisalu naalakkersuisut kaammattorusuppakka inoqarfinnut kinguussaaqqasunut nunaqarfinnullu illoqarfinnullu minnernut angalaneroqqullugit, innuttaasut tikillugit aaliangigassanik aaliangiisarnissaat, tassami tusarniaanerinnaakkut inerisaaneq pisinnaangimmat.

Nunaqarfimmi atukkat imaannaangitsut ilisimaneqarput, aqqissuussiffigineqartussaasullu naatsorsuutigisinnaavarput. Taammammatt Inuit Ataqatigiinniit isorliunerusununi nunaqarfinnilu siunnersuuteqarnikuuvugut *UPA19, Imm 39 Inuussutissarsiuutitigut nunaqarfinnut isorliunerusunullu siuarsaanermik tapiissutinik suliaqartoqarnissaa*. Neriulluta aamma taanna ilassilluarneqarumaartoq, nunaqarfinnik inuussutissarsiorinikkut inerisaanissaq tassuunakkut qularnaarneqarsinnaammat.

Qujavugullu oqallisissiamik saqqummiisumut.